



# Messadi

## per la radunanza communal digls 25 d'avregl 2022

Stimadas votantas e stimos votants

La suprastanza communal Az sottametta igl rapport pertutgont igls suandonts affars.

### Tractanda 2

#### **Surpiglier la Societad da mantignamaint Salouf cun annullar igl madem mument igls statuts dalla societad e da tot las disposiziuns tgi sa basan sen chels statuts**

Cun igl nom «Societad da mantignamaint Salouf» exista ena societad da dretg public. Chella societad è la successoura da dretg dalla societad da migliuraziun Salouf tgi è neida decideida igls 18 da matg 1958. Tenor la lescha da migliuraziun pon las ovras dalla migliuraziun neir surdadas agl cumegn u neir manadas dad ena societad da mantignamaint autonoma. Uscheia è neida fundada da sies taimp a Salouf ena societad da mantignamaint, dantant tgi p.ex. a Riom-Parsonz èn las ovras neidas surdadas agl cumegn cun far ena lescha per reglar igl mantignamaint e la finanziaziun da chellas ovras (daple p.pl. vurdar sot tractanda 3). An oters cumegnuriunds, scu p.ex. a Savognin, ò igl cumegn surpiglia las lavours da mantignamaint ad agen chint.

#### *Istorgia dalla Societad da mantignamaint Salouf:*

- Decisiun dalla radunanza communal igl 1954 ed antschatta dalla migliuraziun a Salouf. Las ponderaziuns da far la migliuraziun èn stadas: perveia dad iertas vevigl do sur onns bleras pitschnas parcelas, tgi eran per part strousch accessiblas. Ultra da chegl ò gia antschet la modernisaziun dall'agricultura cun maschinas novas e grondas.
- Las lavours dalla migliuraziun cun far las novas veias e repartiziuns dallas parcelas on cuzzo anfignen igl 1980. Siva on igls pours antschet cun la cultivaziun digl taragn attribuia da nov.
- Antschatta 1990 è neida fundada la Societad da mantignamaint Salouf, chegl sen cunsegl digl uffezi da migliuraziun cantunal. Chella societad da mantignamaint è stada egna dallas empremas ed anfignen oz egna dallas pacas societads da mantignamaint an chella furma.
- Gl'ò do diversas intervenziuns per surdar la societad da mantignamaint agl cumegn. Ins è pero mai sto bung da sa cunvignair ainfer la societad. Uscheia è la societad restada ainten ena furma da dretg privat. Las veias, drenaschas e bietgs èn adegna nias mantignias e tgiros da maniera exemplarica. Chegl è sto igl cass er siva la fusiun agl cumegn da Surses. La Societad da mantignamaint Salouf ò alloura er surdo agl sarvetsch communal da far an reschia lavours ve dalla reit da veias.
- La fegn digl 2018 è neida eligeida ena nova suprastanza dalla societad, cun l'incumbensa da manar las tractativas per surdar la societad agl cumegn.

#### **Disposiziuns digls statuts:**

La societad da mantignamaint ò igl scopo da mantignair las ovras da migliuraziun tgi èn neidas fatgas igls onns 1962 anfignen 1989 aint igl rom dalla migliuraziun generala cun subvenziuns da cantun e confederaziun. Chegl schinavant tgi igl mantignamaint da chellas ovras è betg nia surpiglia da privats, digl cumegn u digl cantun.

Commembers èn tot igls possesseurs da parcelas da fons e da gôt tgi èn aint igl perimenter dalla migliuraziun. Igl commembers èn obliias da paer contribuziuns da mantignamaint.

#### *Finanzas dalla societad da mantignamaint e contribuziuns digls commembers:*

Las antradas dallas contribuziuns digls possessours (commembers) muntava a ca. CHF 23'000.00 ad onn.

Igl preventiv annual per lavours tgi sa repetan muntava an media a radond CHF 15'000.00.

Las finanzas dalla societad da mantignamaint èn solidas cun ena facultad da radond CHF 50'000.00. Cun surpiglier la societad cun vigour regressiva sen igl 1. da schaner 2022 vo la facultad dalla societad ve aint igl chint digl cumegn.

*Raschungs per surpiglier la societad ed annullar igls statuts:*

La suprastanza dalla societad sa cumpona digl president e e da quatter commembers tgi vignan eligias dalla radunanza generala dalla societad. A caschung dalla davos'elecziun igl 2018 ò la suprastanza dalla societad sa mess a disposiziun per ena dirada d'uffezi da treis onns anfignen la fejn 2021. Cunchegl tgi nigns digls commembers èn stos pronts ple da sa metter a disposiziun pigl uffezi è nia inoltro alla suprastanza communal la dumonda da surpiglier la societad da mantignamaint. Essend tgi la suprastanza communal è stada pronta da metter an vista da surpiglier la societad, ò la radunanza generala dalla Societad da mantignamaint Salouf digls 25 da zarcladour 2021 decida unanimamaintg da dissolver la societad da mantignamaint e da surdar las incumbensas agl cumegn da Surses.

*Basa legala:*

Tenor art. 32 digls statuts dalla societad da mantignamaint ègl pussebel da dissolver la societad, schi igl mantignamaint è garantia d'en'otra maniera; schi la facultad vign liquidada conform agl intent; e sch'igl rendachint è fatg. La dissolvaziun stò neir decideida dalla radunanza communal e neir approvada digl Uffezi d'agricultura e geoinfurmaziun digl cantun Grischun.

*Tge monta la surpignleida pigl cumegn?*

La Societad da mantignamaint Salouf è oz an en bung stadi cun ena reit da veias intacta, drenaschas e bietgs. Igl daners resp. las antradas per las lavours da reparatura e mantignamaint vignan impundeidas conform agl intent. Cun surpiglier igl mantignamaint dallas ovras da migliuraziun von tot igls costs da mantignamaint dallas ovras a chint digl cumegn. Las antradas da contribuziuns digls possessours (commembers) scrodan.

Gl'è da menziunar tgi angal igls cumegns uriunds da Salouf e Riom-Parsoz on incasso taxas per igl mantignamaint dallas ovras da migliuraziun. Tot igls oters cumegns uriunds on fatg las lavours da mantignamaint ad agen chint. Siva dalla fusiun da cumegns ègl da harmonisar las leschas schi spert scu pussebel. Per raschungs digl tractamaint equal ègl necessari da surpiglier la societad da mantignamaint. Er igl Uffezi d'agricultura e geoinfurmaziun digl Grischun benevainta da prancepi gl'intent da dissolver la societad e surdar las incumbensas agl cumegn.

**Proposta dalla suprastanza communal:**

La suprastanza propona alla radunanza communal

- d'approvar la surpignleida dalla Societad da mantignamaint Salouf cun vigour regressiva sen igls 31 da december 2021, cun la resalva dall'approvaziun digl Uffezi d'agricultura e geoinfurmaziun digl Grischun.
- d'annullar igls statuts dalla Societad da mantignamaint Salouf e tot las disposiziuns tgi sa basan chels statuts cun vigour regressiva sen igls 31 da december 2021.

---

### **Tractanda 3**

#### **Annulaziun dalla lescha digl anteriour cumegn da Riom-Parsonz pertutgont igl mantignamaint dallas ovras da migliuraziun e tot las disposiziuns tgi sa basan sen chella lescha**

---

La radunanza communal digl anteriour cumegn da Riom-Parsonz ò approvo igl 1. da december 1996 la lescha davart igl mantignamaint dallas ovras da migliuraziun cun la metter an vigour sen igl 1. da schaner 1997.

*Disposiziuns dalla lescha:*

La lescha regla igl mantignamaint dallas ovras tgi èn neidas fatgas dalla societad da migliuraziun Riom-Parsonz digl 1958 anfignen igl 1993 cun subveziuns da cantun e confederaziun, numnadamaintg: veias da migliuraziun, correcziuns dad uals, drenaschas, protecziuns cunter bovas, tschaffadas da funtangas, bavradoirs (schinavant tgi chels èn betg nias surdos agls proprietaris da fons tenor decisiun da cumegn digls 11 d'otgover 1989), seivs per igl passagi da movel, sanaziuns da veias, veias d'access e punts.

### *Finanzas*

Las antradas da contribuziuns digls proprietaris da fons montan ad onn a

- ca. CHF 6'542.00 contribuziuns alla basa dalla surfatscha
- ca. CHF 8'449.00 contribuziuns alla basa dalla bonitad

Las expensas per lavours da mantignamaint montan a radond CHF 60'000.00 ad onn, tgi è neidas contabilisadas scu cumpensaziun interna da prestaziuns da sarvetsch per las ovras da migliuraziun.

La facultad aint igl fondo da mantignamaint per igls 31-12-2020 monta a CHF 416'972.50.

### *Raschungs per annullar la lescha:*

Scu gio menziuno tar igl affar precedent valan tenor contract da fusiun per la fusiun digl cumegn da Surses las leschas ed igls reglamaints digls cumegns uriunds per lur territori communal, schi dei tg'igl cumegn da Surses relascha ena nova lescha resp. anfignen tgi las leschas digls cumegns uriunds vignan annulladas.

Siva tgi la Societad da mantignamaint Salouf ò dumando da surpiglier las sias incumbensas, ò la suprastanza communal decidia d'annullar er la lescha digl anteriour cumegn da Riom-Parsonz davart igl mantignamaint dallas ovras da migliuraziun. Chegl per contanscher igl tractamaint egal davart igl mantignamaint dallas ovras da migliuraziun sen igl antier territori communal.

### *Tge monta l'annullaziun per igl cumegn?*

Siva l'annullaziun dalla lescha vign igl cumegn ad esser responsabel per igl mantignamaint dallas ovras da migliuraziun da Riom e Parsonz. Uscheia von igls costs da mantignamaint cumplagnamaintg a chint digl cumegn. Igl proprietaris da fons pertutgias on da paer nignas contribuziuns ple.

Sch'igl cumegn vot relascher pigl avigneir ena nova lescha davart igl mantignamaint dallas ovras da migliuraziun pigl cumegn da Surses, stat igl mument betg an discussiun. Enqualtgi incumbensas e dueirs èn gio cuntignias ainten la lescha per carar sen veias da fons, prada, gôt ed alps digl cumegn da Surses. En'otra part niro reglada ainten la lescha da fons, alps e pastgiras digl cumegn da Surses. Chella lescha niro sottamessa anc chest onn alla radunanza communal per approvaziun.

### ***Proposta dalla suprastanza communal:***

La suprastanza propona alla radunanza communal d'annullar la lescha digl anteriour cumegn da Riom-Parsonz davart igl mantignamaint dallas ovras da migliuraziun e da tot las disposiziuns tgi sa basan sen chella lescha cun vigour regressiva per igls 31 da december 2021.

---

## **Tractanda 4**

### **Contract da dretg da biagier cun Pirmin Cotti pertutgont la parcella da cumegn nr. 9958 (parcella da dretg da biagier nr. 9959), Tgapeter, Mulegns**

Pirmin Cotti da Sur dumonda agl cumegn da pudeir acquirar an dretg da biagier ena surfatscha da 3'527 m2 dalla parcella nr. 9958 (parcella da dretg da biagier nr. 5559), Tgapeter, a Mulegns. Chella parcella è ainten la zona d'industreia digls Mulegns.

Igl contract da dretg da biagier digl anteriour cumegn da Mulegns cun la Fasolini Signorell SA (anterioura Signorell & Jäger) per l'antiera zona a Tgapeter a Mulegns tar la piazza da gera è spiro. Gl'è da far novs contracts da dretg da biagier. Las surfatschas vignan scumparteadas da nov. Da nov dumonda er Pirmin Cotti da pudeir surpiglier ena part dalla parcella.

### *Cundiziuns pigl dretg da biagier:*

Igl dretg da biagier vign concedia per ena dirada da 60 onns. Igl tschains digl dretg da biagier vign calculo scu suonda: surfatscha x valeta da basa x tschains = tschains digl dretg da biagier. La valeta da basa corresponda alla valeta digl taragn (valeta commerciala tenor stema uffiziala) e vign redutgeida sen 4/5. Per fixar igl tschains da capitalisaziun vign considero igl tschains publitgia dalla Banca cantunala Grischuna per hipotecas digl martgea monetar cun ena dirada da 3 onns. A chel tschains vign agiunto ena reserva dad 1% per cumpensar eventualas fluctuaziuns futuras. Percheigl vign fixo en tschains da capitalisaziun minimal da 2%. Igl tschains maximal vign fixo sen 7%.

*Basa legala:*

La cunsigna dalla surfatscha an dretg da biagier succeda aint igl rom dallas pussebladads d'utilisaziun tenor urden da biagier an vigour scu piazza da preparar gera e da deposit scu er per eriger eventuels stabilimaints industrials, p.ex. luvratori, halla da fabricaziun, magasin ed oter ple.

Igl ratschaveider digl dretg da biagier ò tenor las disposiziuns dalla lescha da biagier e digl plan da zonas digl anteriour cumegn da Mulegns igl dretg d'eriger, mantigneir e manar sen la parcella da dretg da biagier stabilimaints industrials incl. igls indrezs da menaschi necessaris e las lengias d'affluenza. Pinavant pò el duvra las parts dalla parcella da dretg da biagier tgi èn betg surbiageidas scu sulom per igl menaschi digls stabilimaints industrials e scu piazza da deposit.

*Facit:*

Ord vista dalla suprastanza existan nignas objecziuns per conceder a Pirmin Cotti igl dretg da biagier per la parcella da dretg da biagier nr. 9959 cun ena surfatscha da 3'527 m<sup>2</sup> (parcella da cumegn nr. 9958).

***Proposta dalla suprastanza communal:***

La suprastanza propona alla radunanza communal da conceder a Pirmin Cotti igl dretg da biagier per la parcella da dretg da biagier nr. 9959, Tgapeter, agls Mulegns tenor las cundiziuns menziunadas.

---

## **Tractanda 5**

### **Credit supplementar per la compra da ramplazzamaint d'en auto-stgela d'ocasiun per igls pumpiers da Surses: dumonda da credit d'object da CHF 450'000.00**

---

Tenor incumbensa dalla Sieranza d'edifezis digl Grischun on igls pumpiers da Surses tranter oter la funcziun d'ena basa da pumpiers cun auto-stgela. La zona d'acziun cumpeggia la Regiun Alvra.

*Raschung per la compra da ramplazzamaint:*

Igl auto-stgela actualmointg an funcziun è viglia cun igls sies 32 onns da sarvetsch. Tar la davosa inspecziun tar la controlla da vehichels a motor ins ò catto divers donns da ravetna, tgi pertotgan betg angal parts alla surfatscha, mabagn er parts da sustign. I fiss er da ramplazzar igl accuplamaint. Per en vehichel da 32 onns ègl er adegna pi grev da cattar tocca da reserva. Igl vehichel corresponda naturalmointg er betg ple agl pi nov stadi dalla tecnologia.

Ozande ègl mianc ple pussebel da s'imaginar igls pumpiers sainza en auto-stgela. Agl cass d'evenimaint ò igl auto-stgela ena rolla impurtanta per salvar vetas. La compra da ramplazzamaint per igl auto-stgela existent è en zap necessari per garanteir an futur la prontezza all'acziun.

*Procedura da submissiun e finanziaziun*

Per la compra digl auto-stgela vign applitgeida la lescha da submissiun ed i stò neir fatga la procedura averta. La submissiun succeda cun la resalva dall'approvaziun digl credit dalla radunanza communal e dalla garanteia da subvenziuns e l'approvaziun dalla Sieranza d'edifezis digl Grischun.

La Sieranza d'edifezis digl Grischun ò mess an vista ena contribuziun da 50% digls costs imputabels da max. CHF 450'000.00 per la compra da ramplazzamaint d'en auto-stgela d'ocasiun (i vala en plafunamaint da costs da CHF 450'000.00 incl. TPV). Offertas tgi surpassan igl plafunamaint da costs vignan exclusas dalla submissiun.

La radunanza communal ò d'approvar igl credit brut da CHF 450'000.00.

***Proposta dalla radunanza communal:***

La suprastanza propona alla radunanza communal d'approvar igl credit supplementar brut da CHF 450'000.00 per la compra da ramplazzamaint d'en auto-stgela d'ocasiun per igls pumpiers da Surses.

---

## **Tractanda 6**

### **Contribuziun da promoziun à fonds perdu da CHF 240'000.00 alla cjo AG per sanar igl hotel Danilo a Savognin**

---

Igl petent Oliver Bühler ò cumpro igl november 2021 igl hotel Danilo. Per la compra ò el fundo la cjo SA. Per igl menaschi è neida fundada la cjoo SA. Igl hotel Pianta totga betg tar igl pachet d'investiziun dad Oliver Bühler e resta damai an possess dalla famiglia Klee-Pianta.

Scu chegl tg'igl petent accentuescha an sia dumonda, seia igl hotel da prancepi mantignia bagn. Las renovaziuns las pi impurtantas dalla substanza e tecnica seian adegna neidas fatgas. Tuttegna seiigl ouras da renovar diversas parts digl bietg. Uscheia ins ò renovo e davert la discoteca igl 2021. Igls onns 2022 e 2023 èn preveidas las suandontas lavours: la renovaziun dallas terrassas, igl ramplazzamaint dalla reit IT, igl ramplazzamaint digl indrez d'alarm d'incendi, la renovaziun dallas tgombras (bogns, palantschias, mobigliar, pictour) scu er la transformaziun dalla clavadeira (ustareia 1. plang).

Las investiziuns totalas dallas lavours da renovaziun incl. igl acquist digl hotel Danilo montan tenor las indicziuns digl petent a CHF 4'800'000.00.

#### *Organisaziun da menaschi:*

Oliver Bühler ò fundo la cjoo SA tgi è responsabla per igl menaschi digl hotel Danilo. La direenziun digl hotel on surpiglia Cornelia e José Diaz-Demarmels, tgi magnan er igl hotel Arlos a Savognin.

#### *Ponderaziuns dalla suprastanza communal:*

Igls davos 50 onns è igl hotel Danilo adegna sto ena valeta fixa e constanta per la gastronomia e hotellareia an Surses. La suprastanza communal vot far tot per evitar tgi menaschis existents seran e per tgi menaschis novs survignan ena basa sanga per pudeir dar cutier a giasts.

Graztga alla compra digl hotel Danilo antras la cjo SA, represchentada dad Oliver Bühler, pò neir garantia tg'igl hotel Danilo exista venavant. Chegl è digl totfatg agl senn dalla suprastanza communal e dalla Turissem Savognin Bivio Albula SA. Igl hotel cumpeggia actualmaintg 30 tgombras cun 60 letgs. Cun igl menaschi vignan generadas pernottaziuns e cotras er antradas per igl cumegn.

La suprastanza benevainta igl project dad Oliver Bühler ed è persvadeida tgi gl'è impurtant per Surses da mantigneir igl hotel Danilo.

#### *Contribuziun da promoziun:*

La contribuziun da promoziun vign concedeida tenor las directivas davart la promoziun da hotels e da menaschis d'alloschamaint cun letgs administros digl cumegn da Surses. Cun eir or d'ena somma d'investiziun da 4.8 miu. francs (incl. la compra digl hotel) prevei la suprastanza - cun la resalva dall'approvaziun dalla radunanza communal - da conceder alla cjo SA ena contribuziun da promoziun unica à fonds perdu da max. CHF 240'000.00, vot deir 5% dalla somma d'investiziun, per sanar igl hotel Danilo.

Vess la somma d'investiziun d'esser pi bassa tgi preveida, sa redutgescha la contribuziun correspondentamaintg. Fiss la somma d'investiziun pi ota, rastess la contribuziun tar max. CHF 240'000.00.

#### ***Proposta dalla suprastanza communal:***

La suprastanza propona alla radunanza communal da conceder alla cjo SA ena contribuziun da promoziun unica à fonds perdu da max. CHF 240'000.00 per sanar igl hotel Danilo a Savognin.

---

## **Tractanda 7**

### **Contribuziun à fonds perdu da CHF 263'000.00 alla Nova Fundaziun Origen per renovar igl hotel Liun a Mulegns**

---

La Nova Fundaziun Origen ò inoltro ena dumonda da sustign per las lavours ve digl hotel istoric Liun. L'avertura temporara digl hotel la stad 2021 ò procurò per passa 23'000 visitaders agls Mulegns, tgi on fatg part a visetas guidadas, referats ed occurrenz. Chel grond interess ò confirmò l'intenziun dad Origen da renovar igl hotel Liun da maniera estendeida e d'igl darveir scu hotel da cultura.

#### *Istorgia digl hotel Liun*

Igl hotel Liun è ena paretga digl taimp dallas carotschas da posta. Da lez taimp pernottavan mintg'onn anfignen 22'000 viagiators aint igl «Liun». Cun la sia autenticità e la sia sostanza unica totga igl hotel Liun tar las pi impurtantas perdetgas istoric-culturalas digl taimp digls pioniers digl turissem grischun. Cun la sia istorgia digls origins ainten l'amprema mesadad digl 19avel tschentaner totga el er tar igls amprens hotels e da pi retga tradiziun digl Grischun.

#### *Lavours da construcziun e sanaziun preveidas*

Igl aton 2019 ò la Nova Fundaziun Origen acquistò igl hotel Liun agls Mulegns ed ò instradò lavours da sanaziun complessivas. La renovaziun cumpeggia la sanaziun digls tetgs e dallas fatschedas, la sbuada dalla tgadafi decadenta, la furnaziun dallas tgombras, la renovaziun digls salvs publics (sala blava, steiva digl Liun, salon, ustareia), l'installaziun dalla tgadafi nova, l'installaziun digl scoldamaint da pellets nov, la construcziun da parcadis novs e la sanaziun dalla tgesa da posta scu recepziun digl hotel. Igl costs totals dalla renovaziun digl hotel Liun montan a CHF 5'260'000.00.

La sanaziun accurata e la furnaziun nova digl hotel Liun scu hotel da cultura dattan alla tgesa ena taimpra unica. La renovaziun moderada digls salvs istorics fò andamaint igl taimp da prosperità digl hotel. La nova furnaziun esclusiva dallas tgombras fatga da designers renomatos segl antier mond fon digl Liun en hotel unic. Uscheia vign sviluppada p.ex. per mintga tgombra en'atgna tapeta, tgi dat angal agls Mulegns.

Scu gio tar igls projects passos collaborescha Origen er ossa da moda strètga cun igls mastirants locals per renovar igl hotel. Gio oz èn participadas 17 interpresas da Surses allas lavours da renovaziun. Igl volumen dallas lavours an favour dalla mastranza locala cumpeggia ples milliuns francs.

#### *Argumaints da vendita exclusiv:*

Malgro tgi Mulegns è strousch sa sviluppo igls davos decennis, è la Nova Fundaziun Origen persvadeida digl potenzial turistic e cultural-istoric dalla vischnanca. Igl fatg da spustar la «Tgesa alva» ò procurò ainten l'antiera Svizra per atenziun mediala. Cun l'avertura digl hotel Liun ed igl schlargiamaint dallas occurrenzas culturalas vignigl a dar nova veta agls Mulegns.

Igl hotel Liun vign ad esser uscheia puspe en impurtant motor social ed economic an Surses. Ultra da chegl vignan stgaffeidas radond 15 plazzas da labour ainten la vischnanca da Mulegns. En hotel Liun veiv porscha pussebladads da pernottar an divers segments da prietsch per viagiators individuals tgi èn interessos alla cultura. Origen chinta cun ena bunga occupaziun digls 30 letgs. Ena purscheida culturala vasta, tgi sa drezza a tot las classas dalla populaziun, furma ena purscheida attractiva per igl turissem an Surgôt e rinforza l'antiera val.

#### **Contribuziun da promoziun:**

La contribuziun da promoziun vign concedeida tenor las directivas davart la promoziun da hotels e da menaschis d'alloschamaint cun letgs administros digl cumegn da Surses. Cun eir or d'ena somma d'investiziun da 5.26 milliuns francs prevei la suprastanza - cun la resalva dall'approvaziun dalla radunanza communal - da conceder alla Nova Fundaziun Origen ena contribuziun da promoziun unica à fonds perdu da max. CHF 263'000.00, vot deir 5% dalla somma d'investiziun per sanar igl hotel Liun.

Ainten la somma d'investiziun è la compra digl hotel Liun betg cumpigleida perchegl tgi lez import è gio nia risguardo tar igl project «salvar Mulegns».

Vess la somma d'investiziun d'esser pi bassa tgi preveida, sa redutgescha la contribuziun correspondentamaintg. Fiss la somma d'investiziun pi ota, rastess la contribuziun tar max. CHF 263'000.00.

*Facit:*

La supranza communal benevainta las maseiras da construcziun e da sanaziun dalla Nova Fundaziun Origen. Igl hotel dispona d'ena structura architectonica ed istoric-economica ordvart preziosa, per la quala i renda da s'angascher.

Igl sustign dumando agl cumegn gida da moda essenziala alla sanaziun e gida da recaltger contribuziuns subsidiaras dad ulteriours promotours. Origen prevei da darveir igl hotel Liun la fegn digl onn.

**Proposta dalla supranza communal:**

La supranza propona alla radunanza communal da conceder alla Nova Fundaziun Origen ena contribuziun da promoziun unica à fonds perdu da max. CHF 263'000.00 per renovar igl hotel Liun agls Mulegns.


---

Tinizong, igls 7 d'avregl 2022

**Per la supranza communal Surses:**



Leo Thomann  
mastral



Beat Jenal  
canzlist